

Cjua xi ma jo catsihindu San Pablo xi cumá rë xuta nandya Tesalónica

1 Ngayin, Pablo cojo Silvanu cojo Timoteo ne, ningatjin ngu xujun vi tsujun, ngayujun ni xi ma tangun ngayun tsëhë xi macjain nuju Nina Nahmi naja cojo Nai naja Jesucristu, ngajan nandya Tesalónica. ²Nina Nahmi naja cojo Nai naja Jesucristu ne, catisua nuju me cjuandaja cjuajeya.

Hya xi cuinduva Cristu ne, Nina ne, sahmi me castigu xuta xi tjin jyé rë

³Hachu tjin niji xi tihin nacuechji rë Nina ngatsë nuju ngayun. Hacuaha ndatjin xi cuatjin nihñi ta, tsëhë xi jemu xcun tivangun xi macjain nuju, hacuaha hitsë sa jima tsejen cjuahmutacun xi tjin nuju jima ngu ngayun cojo xingun. ⁴Vëhë xi ngayin ne, hya xi ma tangun me xi macjain rë Nina ne, nújin cojo rë me ta jemu sua má niji tsëhë xi ngayun ne, jemu yehe tacún hacuaha jemu macjain nuju, handasa jemu yehe cjuañihi xi tivatjun tijima. ⁵Cuatjin ma tsejen xi Nina ne, fahachuva naja me cojo cjuaquixi. Hane xi cuijnetaha ne, cuichja Nina ta sacú nuju ngu cahndé hiscan xi me vëhë má titjun me, ta ngatsë rë vëhë xi jercu choho tivatjun tijima.

⁶Xi tsingatahacacun Nina ne, yëjë ni xuta xi choho tisahmi cojo nuju ne, ndatjin xi hacuaha cuma ngojo cojo rë me, ⁷hacuaha ndatjin xi ngayaan xi choho tivatjuun tijima ne, sacú naja ngu cahndé xcun Nina xi chjahanjendan, hya xi Nai naja Jesús cuya me tsëhë ngahnga ngajñi rë ngu ndihi jyë cojo ángel rë me xi jercu hñu ngahñu rë. ⁸Hya sahmingojo me cojo xuta xi macjaain rë Nina, xi hacuaha hndiin me tsëhë cjua ndajyihí tsëhë Nai naja Jesús. ⁹Hane castigu xi cuma xuta xi cuacun vë ne, cuaxëxin Nina me ngu ladu hiscan xín, xi tsajin nu tsajin nixtin xi cuechu me xcun Nai naja. Cuatjin ne, xi scuiin me hasen ndajyihí cojo ngahñu rë Nai naja. ¹⁰Cuatjin cumá nixtin xi cuinduva Nai naja xi cuma jyë cuma hnga me. Hya ne, cuinduva me, cojo sa xi ngayëjë ni xuta xi camacjain rë me ne, cjuaharcun rë me hacuaha cjuercun rë me, hisca cojo ngayujun ni ta tsëhë xi camacjain nuju cjua ndajyihí xi canújin cojo nuju. ¹¹Vëhë xi ngayin ne, jercu chjahyin rë Nina naja xi ngayun xi má yun ladu rë me ne, catamachji

rèhè rè me ngayun. Hacuaha chjahyin rè Nina xi cojo ngahñu rè me ne, cuetjucaa jain yějè ni cjuandaja xi ningatuhuntacun hacuaha yějè ni xa xi nihñu tsèhè xi macjain nuju me. ¹²Hacuaha xi cuatjin cumá ne, xuta xi vutsejen me ne, sahmi jyè sahmi hnga me Nai naja Jesús, hacuaha ngayun ne, cuma yehe cuma hnga ngayun ngatsè rè cjuandaja rè Nina naja cojo cjuandaja rè Nai naja Jesucristu.

Cuinduva ngu cha tsehen

2 Quihndè ne, ha hyun xi Nai naja Jesucristu ne, cuinduva nga me xi sahmi tangun naja me. Vèhè xi nújin cojo nuju ta ²hacuiin ngutjen cumacjintacun, hacuiin rcun cuma, sa xi sacú nuju cjua xi ha cavechu nixtin xi cafehe Nai naja. Handasa cuatjin cuichja xuta cojo nuju, o sa xi cuichja me xi cuatjin casua Nina me cjuatacun, o sa xi chjuhunntsun ngu xujun xi cuichja cuatjin sacuaha xi ngayin caningatjin, peru hacuiin cumacjain nuju ta, quixiin. ³Catuun camahani cahndé xi cumandacha ngayun, tsèhè xi chaja sa xi cuechu nixtin vèhè ne, titjun ne, jemu sahmi xuta condra Nina, hacuaha cuinduva ngu cha tsehen xi hatuxa cuechiin cha xcun Nina. ⁴Cha tsehen jan ne, choho scuèè cha yějè ni xi hmí nina, hacuaha choho scuèè cha yějè ni xi vechu chuya rè xi chjaharcun rè. Hane hisca cjue cha cuejña cha cahntsua yungun xi matitjun xi tsèhè Nina, hane cuichja cha ta cha vèhè nina cha.

⁵¿Há vitsjiin nuju ta ha cachjá cojo nuju cjua vihi, hya xi

cavitejña nandya nuju? ⁶Hacuaha ha hyun ta xi ngutjen ne, tsajin cahndé cuinduva cha tsehen jan ta, cuinduva cha hisca xi cuechu nixtin xi Nina sua me cahndé. ⁷Hacuaha cjuatsehen ne, hisca hyan, ta jemu tijima yehe. Hane hisca xi cjuexin me xi tivechja cahndé ne, ⁸sehe hya cuinduva cha tsehen jan. Peru Nai naja Jesús ne, tsiquehen me cha cojo tjo hntsua ni me, hacuaha tsicjè me cha, hya xi cuinduva me. ⁹Hya xi cuinduva cha tsehen jan ne, tsèhè xi Satanás tsingatju rè cha ne, jemu hñu ngahñu rè cha hacuaha jemu cjín xcusun cjuarcun ndacha xi sahmi cha. ¹⁰Hacuaha sahmi cha yějè ni xcusun cjuatsehen xi cuindacha cha xuta. Cuindacha cha xuta xi cuechiin xcun Nina ta, tsèhè xi mijí rè me chuyiin rè me cjuaquixi xi vaxètje naja. ¹¹Ngatsè rè vèhè ne, sua Nina cahndé xi cumandacha xuta jan, cojo sa xi cumacjain rè me cjuandesu jan. ¹²Ngajan xi cuma me castigu, ngayějè ni me xi camacjaain rè cjuaquixi jan ta, tu cjuatsehen jan cachuya rè me.

Nina cavaxijin nuju me xi cuetjuntjun

¹³Peru ngayin ne, meje rè xi jercu tihin nacuechji rè Nina ngatsè nuju ngayun xi hmucacun nuju Nai naja ta, tsèhè xi Nina ne, cavaxijin nuju me xi tjun tjun ngayun cuetjuntjun. Ngatsè rè xi Hasen rè Nina ne, titsityjahi rè xahasen nuju xi tsajin xi cún nuju xcun Nina, hacuaha ngatsè rè xi macjain nuju cjuaquixi ne, vèhè xi cuetjuntjun. ¹⁴Hya xi canújin cojo nuju cjuandajiyihi

rë Nina ne, hya cavaxijin nuju me xi cuetjuntjun. Cavaxijin nuju me xi sacú nuju cjuahñu ndajyihí sacuaha xi tjin rë Nai naja Jesucristu. ¹⁵Vëhë xi nújin cojo nuju ta xi camacjiintacun, hacuaha xi canichayuun cjuaxi cavicuyin nuju, cjuaxi canújin jan cojo cjuaxi canihindín jan. ¹⁶Nai naja Jesucristu cojo Nina Nahmi naja ne, casahmi hmucacun me ngayaan, hacuaha cojo cjuandaja rë me casua naja me cjuetacun xi tsajin hora tsajin nixtin xi cjuë, hacuaha casua naja me ngu cjuaxi ndajyihí xi nechayan ni rë nixtin xi cuetjucaa. ¹⁷Me vëhë ne, catisua me cjuetacun xahasen nuju, hacuaha catisua nuju me ngahñu xi cuinújun hacuaha xi nihñu yëjë ni cjuandaja.

Nihñu oración ngatsë niji

3 Quihndë ne, nihñu oración ngatsë niji, cojo sa xi cjuaxi rë Nai naja ne, xati cuechu jingujyë ni, hacuaha cojo cjuasua cjuahatsja xuta cjuaxi rë me, sacuatjin camá ngajñi nuju. ²Hacuaha nihñu oración, cojo sa xi cuetjintjin tsëhë xuta tsehen ta, hacuiin ngayëjë xuta xi macjain rë me Nina. ³Peru Nai naja ne, hatuxa quixi me cojo cjuaxi rë me. Sua me yun ngahñu xi scaa nuju, hacuaha cuetjo nuju me, cojo sa xi tsajin mé cuma sahmi Satanás cojo nuju. ⁴Ngatsë rë Nai naja ne, fë mangutacuín ta ngayun ne tinihñu jain, hacuaha nihñu sa cjuaxi vitexin nuju. ⁵Nai naja ne, catincha me cjuahmutacun rë Nina xahasen nuju, hacuaha catisua nuju me ngahñu rë Cristu xi scaa nuju tsëhë yëjë ni cjuacjintacun.

Meje rë xi nihña xa

⁶Quihndë ne, sacuahatjin meje rë Nai naja Jesucristu ne, vitexin nuju xi naxunxun yojo nuju tsëhë yëjë ni me xi jemu tsëhé me sahmi me xa, hacuaha xi sáhmii hacutjin xi cavicuyin nuju xi nihñu. ⁷Ngayun ne, ha hyun ta meje rë xi nihñu ngu xa sehe sacú xi xinu, sacuatjin xi cahyun xi canihñí. Hacuiin tu jyuu ni cavinechinyinjñi ngajñi nuju ne, ⁸hacuiin tu cjuatjo ni casacu niji niñu xi cachini ta, nixtin nixten ne, jercu canihñí xa, cojo sa xi hacuiin ngayun nihñu gastu ngatsë niji. ⁹Handasa satë niji cahndë xi chjahyin nuju xi cuisecun niji, peru cachjahyiin ta canihñíxin xa, xi cuejñí ngu xcusun xi cuatjin nihñu. ¹⁰Hacuaha hya xi cavinechintihin cojo nuju ne, hya canújin cojo nuju ta: Me xi mijí sahmi xa ne, xi catuun sinë me. ¹¹Cuitjin tinújin cojo nuju ta, tsëhë xi casacu niji cjuaxi ngajñi nuju ne, hinchajñi me xi sáhmii xa. Tu tsinguissehenjñi me xcun cjuacjintacun xi ña cuendaain rë me. ¹²Ngajan xi vitexin rë me xi cuacun vë, sacuatjin meje rë Nai naja Jesucristu, xi catiyujyuu cjuatacun rë me, hane catisahmi me xa xi sacú sinë me.

¹³Hacuaha ngayun ne, xi camacjiintacun tsëhë cjuandaja xi tinihñú. ¹⁴Sa xi tjin jarë me xi mijí cuihndë cjuaxi tinújin xcun xujun vihi ne, chjuhuncuendun jarë me jan, hacuaha xi caninguisuunjnūu cojo rë me, sehe me vëhë ne, cuma sava rë me. ¹⁵Peru hacuiin chocho chun me ta, tuhun rë me cjuaxi cojo cjuandaja ta, tsëhë xi xingun me.

Cjua xi cuijnetaha

¹⁶Hane Nai naja, me xi tséhë cjuajeya ne, catisua nuju me cjuajeya yějë ni nixtin hacuaha xcun yějë ni cjuacjintacun. Hacuaha Nai naja yaha nuju me ngayujun

ni. ¹⁷Suva ngahan, Pablo, tsihindu nuju ngu cjuá vi, xi tisuá nuju ngu nina. Hatuxa xcusun naha xi cuitjin tsihindu xcun yějë ni xujun xi tsingátju. ¹⁸Cjuandaja rë Nai naja Jesucristu ne, catisehen xahasen nuju ngayujun ni.